

ფინიში ეფექტური იქნება

თბილისი. “ლოკომოტივის” სტადიონი. 3 ოქტომბერი.

“დინამო” (თბილისი) - ცსკა - 0:0.

“დინამო”: ურუშაძე, ძოძუაშვილი, კანთელაძე, რეხვიაშვილი, ჭოხონელიძე (ილიაძე), პეტრიაშვილი, კუტივაძე (ცხოვრებოვი), ასათიანი, გავაშელი, გ. ნოღია, ლ. ნოღია.

ცსკა: პშენიჩნიკოვი, პონომაროვი, შესტერნიოვი, აფონინი, კაპლიჩნი, უტკინი, პლახეტკო, მასლიაევი, ფედოტოვი, პოლიკარპოვი, დუდარენკო.

მსაჯი: მ. პინსკი (ხარკოვი).

დავანებოთ თავი იმას, რომ ამ მატჩში გამარჯვებით ერთ-ერთი მხარე საგრძნობლად გაიუმჯობესებდა საპრიზო ადგილებზე გასვლის შანსს. ჩემპიონატის მოცემულ ეტაპზე სატურნირო ცხრილმა იმდაგვარი სახე მიიღო, რომ თბილისის “დინამო” და მისი გულშემატკივრები ყველაზე მეტად ცსკა-ს შინაური საქმიანობის ანალიზით არიან დაკავებულნი და პირუკუ - არმიელებს მოსვენებას არ აძლევენ თბილისელთა ერთგვარი გააქტურება ტურნირის ფინიშზე.

გუშინდელ მატჩს სხვა პრინციპული მნიშვნელობაც ჰქონდა მოასპარეზეთათვის. ჯერ ერთი, “დინამოსა” და ცსკა-ს შეხვედრათა ტრადიცია, რომელიც საბჭოთა ფეხბურთის ისტორიის ერთ-ერთი ნათელი ფურცელია, ცხადყოფს, რომ 30-წლიანი უკომპრომისო ბრძოლაში არმიელებს ერთგვარი უპირატესობა აქვთ (ცსკა-მ 24 შეხვედრა მოიგო, 18 ნააგო და 9 თრედ დაამთავრა, ბურთების სხვაობა 91-72 მისსავე სასარგებლოდ).

შემდეგ, ცსკა-ცა და თბილისის “დინამოც” ჩვენი დღევანდელი ფეხბურთის მოწინავეთა რიგებშია. გუნდები საკმაოდ განსხვავდებიან ერთმანეთისგან ხელწერითა და მსოფლმხედველობით. გუშინდელ მატჩს ამაზეც უნდა გავცა პასუხი - რომელი ხელწერაა უფრო საიმედო და ეფექტური, ის რომელსაც აგერ უკვე რამდენი წელია ნერგავენ არმიელები, თუ ის, რომელზეც აქცენტს “დინამო” სვამს. ერთი სიტყვით, ბრძოლას წმინდა სატურნირო ღირებულების გარდა, ერთგვარი თეორიული მნიშვნელობაც უნდა ჰქონოდა.

სამწუხაროდ - უნდა ჰქონოდა. სინამდვილეში კი ქულის აღების დაუოკებელმა სურვილმა მთლიანად შეცვალა ბრძოლის ხასიათი და ეს ბრძოლა, ჩემპიონატის რიგით მატჩს დაამსგავსა ერთი განსხვავებით. ცალკეულ მოთამაშეთა საშემსრულებლო ოსტატობა მაინც მაღალ დონეზე იდგა. არმიელთა დაცვა - სსრ კავშირის ნაკრების დაცვაა, მინუს ძოძუაშვილი და ხურცილავა. ასე რომ, თბილისელი ფორვარდების წინაშე ერთობ რთული ამოცანა იდგა.

წინასწარ უნდა ვთქვათ: ცსკა-ს დაცვამ უზრუნველყო თავისი კარის უსაფრთხოება, მაგრამ ზოგ შემთხვევაში ამის მისაღწევად აშკარად მიმართავენ წესებით აკრძალულ ილეთებს. ცსკა ბოლო წლებში არ გამოიჩინა თამაშის სიმსუბუქით, მაგრამ გუშინდელ მატჩში ზოგიერთი მისი ფეხბურთელი უდაოდ ზომას სცილდებოდა. აი თუნდაც უტკინი, ახალგაზრდა ნახევარმცველი, რომელმაც თუ არ ვცდები, ყველაზე მეტჯერ მიიქცია მსაჯისა და აღმფრთხილებელი მაყურებლის ყურადღება. ასევე თამაშობდა

კაპლიჩნიც. მატჩის სანახაობრივი მხარე გაცილებით მეტს მოიგებდა, არმიელ მცველებს მაგალითი თავიანთი ლიდერის შესტერნიოვისგან რომ აეღოთ.

უცნაური პოზიცია ეკავა წესრიგის დამრღვევთა მიმართ არბიტრ მ. პინსკის. დაუსრულებელმა შენიშვნებმა და გაფრთხილებებმა ფეხბურთელებს მოუხსნა პასუხისმგებლობის გრძობა და ვინაიდან მსაჯი აშკარად ერიდებოდა რადიკალური ზომების მიღებას, უტკინსა და მის თანამოაზრეთ ფართო სამოქმედო ასპარეზი გაეხსნათ.

საერთოდ, მსაჯის ორჯოფულმა გადაწყვეტილებებმა ლამაზი, ტემპიანი და აზარტული ბრძოლა ბოლოს და ბოლოს გამოცანას დაამსგავსეს. მაყურებლებმა თამაში უცნაური, გაურკვეველი გრძობით დატოვეს. რა მოხდა ბოლოს და ბოლოს ვერაფერს გაიგო. რატომ არ ჩაითვალა თამაშის მიწურულს არმიელთა კარში გატანილი გოლი, ან რა წუნი ედო ცსკა-ს საპასუხო ბურთს, კაცმა არ იცის. ყველაფერი ეს, ჩვენი აზრით, მოხდა იმიტომ, რომ მსაჯმა თავიდანვე ლიბერალური პოზიცია დაიკავა და ხელში ვერ აიღო ბრძოლის სადავეები.

ისე კი, მასპინძლების უპირატესობა ორივე ტაიმში აშკარა იყო, ისინი უფრო აზრიანად მოქმედებდნენ თავდასხმაში და რამდენიმეჯერ კარის ალების ხელსაყრელი მომენტიც კი ვერ გამოიყენეს. “დინამომ” დაკარგა მეტად საჭირო ქულა. ეს, რა თქმა უნდა, დასანანი ფაქტია, მაგრამ თამაშის ხარისხის თვისობრივი გაუმჯობესება საბაბს გვაძლევს ვიფიქროთ, რომ თბილისელებს ეფექტური ფინიში ექნებათ.

ნ. გუგუშვილი.

“ლელო”, 5 ოქტომბერი, 1969 წ.